

L'heureux estat de l'Eglise Chinoise est mis sur cette Pierre.

jour & de produire de si heroïques vertus à la veüe de tous les hommes; c'est pourquoy nous les avons gravées sur cette grande Pierre.

XVI. Je dis donc que Dieu, qui est veritable en luy mesme, n'a point de principe; qu'il est pur; tousjours paisible, en repos, & immuable. Je confesse que c'est le Createur de toutes choses, qu'il a fait le Ciel & la Terre, de la façon que nous les voyons. Je croy qu'une des personnes divines s'est incarnée pour le salut du genre humain; qu'elle est montée au Ciel, brillante de lumiere comme un Soleil, & que destruisant les tenebres elle a establi une verité inesbranlable en toutes choses.

XVII. Ce grand Roy tout esclatant de lumiere, qui est à la verité le premier de tous ceux qui ont esté assis sur le Throne, s'estant servi favorablement de l'occasion a osté tous les ostacles qui s'opposoient au bonheur de l'homme luy ouvrant largement l'entrée du Ciel, après luy avoir eslargi la Terre. L'Euangile que nous recevons pour Loy, & qui a esté promulgué dans le Royaume de *Tam* est très illustre en ce qu'il a porté la doctrine au monde, basti des Eglises; Parcequ'il a conduit à bon port les vivans & les morts, & pour le dire en un mot, c'est parcequ'il a tellement fait triompher le bonheur que le monde ne jouit maintenant que d'un profond repos.

Le restablissement des Eglises.

XVIII. Dieu permit que *Caò cumi* suivant les traces, & les inclinations de ses Ayeuls, & de ces Ancestres, prit resolution de restablir de nouveau des Eglises; Ce qu'il fit avec tant d'ardeur & de zele qu'il fit ediffier des Temples de Paix si hauts, si magnifiques, & en si grand nombre, qu'ils remplirent toute la Terre. La veritable Loy prit pour lors un nouvel esclat & fut en plus grande veneration qu'elle n'avoit esté. Ce mesme *Caò cumi* honora l'Evesque d'un

Le titre de l'Evesque, & l'estime que l'on en fait.

titre glorieux & regit si bien son peuple qu'il leur fit goustier à longs traits le repos, & la douceur de la vie.

XIX. Le sage Roy *Ni uen cum* a eu l'avantage de suivre les vrayes, & les infaillibles voyes. Les Tables Royales estoient magnifiques, & illustres; Parceque les lettres qui estoient escrites au dessus paroissoient avec esclat & avec pompe; Les Tableaux des personnes Royales y brilloient admirablement bien & y estoient depeintes avec tant de Majesté, que le peuple les saluoit humblement, & leur faisoit de tres profondes reverences en signe d'estime, & de respect. Tout estoit dans une parfaite liberté, & l'on peut dire que tout nageoit dans les plaisirs, & le delices & jovissoit d'un profond repos.

XX. Le Roy *Sò cum* est venu de luy mesme à l'Eglise, pendant son regne. Il a esté comme un Soleil de saincteté qui a brillé aux yeux de tout le monde: pendant ce temps les nuës heureuses ont dissipé toute sorte d'obscurités, d'erreurs, & de tenebres: de sorte que la maison Royale estant comblée de bonheur, & de felicité, les malheurs ont pris fin, & nostre S. Empire est revenu dans son premier estat de gloire, par la cessasjon de troubles & des broüilleries.

XXI. Le Roy *Tai cum* fu a esté extrêmement obeissant. Il a aplani la Terre & le Ciel par sa vertu. Il a donné la vie au peuple & l'avancement à toutes choses. Il a envoyé des Odeurs à l'Eglise en action de graces, & a mis en pratique les œuvres de Charité. Le Soleil, & la Lune trouvoient esgalement leur sejour en leurs personnes; C'est à dire, que tout le monde accouroit pour y rendre leurs obeissances.

La gloire de l'Eglise

XXII. Le Roy *Kien cum* estant monté sur le throsne rendoit la vertu tout à fait illustre. Il porta la Paix, & pacifia par ses armes quatre Mers diffé-

Illustrée par les articles de la Roy.